

PROTOCOL FAT BUN DA LA RADUNANZA CUMÜNALA DALS 16 SETTEMBER 2010**Protocol no. 8**
Radunanza cumünala dals 8 lügl 2010, 20.15 – 22.45

Preschaintas: 19 persunas

S-chüsats: Cla Sarott, Dumeng Jann, Albert Mayer e Jachen Andri Schmidt

Il capo constata cha la radunanza saja gnüda convocada in basa a nossa constituziun cumünala e dumonda sch'inchün haja da far objecziuns. Sainza chi vegnan fattas objecziuns, vegnan nominats seguaints scrutinadurs: Peder Poo e Cla Rauch.

Protocol

Il protocol no. 7 da la radunanza cumünala dals 16 gün 2010 vain approvà.

1 9 FINANZAS ED IMPOSTAS
Rendaquint cumünal 2009

Il capo repassa chapitel per chapitel dal quint da gestiun e remarcha ils posts chi muossan üna differenza plü gronda in congual cun l'on avant e cul preventiv. Ils schefs dals differents decasteris dan üna cuorta survista da lur departamaints e differentas dumondas vegnan respusas.

Il quint cumünal 2009 serra cun entradas da fr. 8'490'106.15 e sortidas da fr. 7'758'604.84 e davo resguardadas las amortisaziuns da fr. 752'896.80, cun ün vanz da fr. 731'501.31.

Il quint d'investiziun pel 2009 serra cun entradas da fr. 1'068'685.60 e sortidas da fr. 1'759'663.30, cun ün investiziun netta da fr. 690'977.70.

Il bilantsch cumünal 2009 muossa ün chapital agen da fr. 1'034'666.90.

Il capo preschainta cuort e summaricamaing il rendaquint da l'ameglioraziun pel 2009.

Il president da la cumischiun sindicatoria, sar Andri Lansel, orientescha sur da la revisiun fatta tras il büro da la Lischana Fiduziari SA da Scuol sur la lavur da la cumischiun in connex cul rendaquint cumünal. A man da cifras indicativas da finanzas declera el la situaziun generala dal Cumün da Sent. Ils decasteris d'aua, chanelisaziun, electric ed immundizchas vegnan cuvernats plainamaing cullas taxas. Oters tschögns e cussagls al Cussagl cumünal stan scrits aint il rapport detaglià da la revisiun. La cumischiun sindicatoria propuona a la radunanza d'acceptar il rendaquint sco preschantà e da dar dis-charg als organs respunsabels. La radunanza cumünala decida, sainza cuntravusch, da far bun il rendaquint cumünal, il quint da gestiun, il quint d'investiziun, il bilantsch cumünal e'l rendaquint da l'ameglioraziun pel 2009.

2 340.503.03 Plazzal da sport
Quint final da la plazza da sport Palüzot

L'actuar orientescha summaricamaing sur dal quint final da la plazza da sport.
Las cifras sun las seguaintas:

Cuosts brüts:	Fr. 905'378.30
Subvenziuns AVS	- Fr. 214'000.--
Taxas da cura (Sent Turissem)	- Fr. 170'000.--
Vendita da terrain	- Fr. 41'700.--
Donaziuns (Padrinadi per cumüns da muntogna)	- <u>Fr. 278'200.--</u>
Cuosts nets:	Fr. 201'478.30

3 700 PROVEDIMAIN D'AUA
Decisiun a regard cumpetenzas pel levamaint dals bügls

Il schef d'aua orientescha ch'illa radunanza da bügls dals 18 november 2009 d'eira gnü fat la proposta da surdar la cumpetenzza per decisiuns per levar bügls a la radunanza.
Il Cussagl cumünal propuona d'agredir a quel giavüsche e da fixar cun decisiun da radunanza quella cumpetenzza.
La radunanza cumünala decida, sainza cuntravusch, da sustegner la proposta dal Cussagl cumünal.

4 790 PLANISAZIUN DAL TERRITORI
Lavurs d'infrastructura Archas Sura

Il schef d'infrastructura orientescha ch'in connex cullas lavuors da la via da quartier dessa güsta l'ocasiun da metter in net l'infrastructura cumünala in quel cuntegn. El declera a man d'üna skizza che chi vain fat ed orientescha sur dals cuosts davart dal cumün e sur da la part dals privats. Cun quai chi's ha stuvü reagir subit, s'haja decis da far quistas lavuors. Il credit corresponsuent per quistas lavuors, chi sun per part fingià effetuadas, vain dumandà illa prosma radunanza cumünala.

5 VARIA

1. Infrastructura La Chavorgia

Ün votant manzuna chi füss bun schi's pudess far oura las chünettas e schi's pudess dar ün sguard da las lingias d'aua e chnalisaziun giò La Chavorgia. Tenor el ais la dimensiun da la lingia massa pitschna.

Il schef d'aua piglia incunter l'intimizaziun ed as occuperà culla fatschenda.

2. Equalisaziun da finanzas

I vain remarchà cha cun ün bun rendaint as survegna plü pacas subvenziuns dal chantun ed i's gnarà classificà in ün' otra classa da finanzas. Il capo conferma quista constataziun e declera cha l'Uffizi da cumüns vezza il Cumün da Sent, sco da plü bod, illa 3. classa da finanzas. Intant es il Cumün da Sent classificà illa 4. classa la quala permetta da survgnir imports considerabels davart da l'equalisaziun da finanzas.

L'actuar:
